



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-91

08/02/2022

ქ. თბილისი

ქ. თბილისის მუნიციპალიტეტში, ნაძალადევის რაიონში შპს „დასის“ საღებავების წარმოებაზე სკრინინგის გადაწყვეტილების შესახებ

შპს „დასის“ მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია, ქ. თბილისში, ნაძალადევის რაიონში საღებავების წარმოების სკრინინგის განცხადება.

სკრინინგის განცხადების მიხედვით, შპს „დასის“ საქმიანობის სფეროა საღებავების წარმოება. კომპანია 2018 წლიდან ამზადებს ზეთოვან და წყალდისპერსიულ საღებავებს. კერძოდ, საღებავის მშრალი და თხევადი კომპონენტების ერთმანეთში შერევას. გარემოსდაცვითი ზედამხედველობის დეპარტამენტის უფლებამოსილი პირის მიერ შპს „დასის“ მიმართ საქართველოს ადმინისტრაციულ სამართალდარღვევათა კოდექსის 79⁷ მუხლის პირველი ნაწილით გათვალისწინებულ სამართალდარღვევაზე 2021 წლის 11 მარტს შედგენილ იქნა ადმინისტრაციული სამართალდარღვევის შესახებ №063004 ოქმი.

საწარმო განთავსებულია ქ. თბილისში, ნაძალადევის რაიონში, მექანიზაციის ქ. N1-ში 308 მ² ფართობის მქონე არასასოფლო-სამეურნეო დანიშნულების მიწის ნაკვეთზე (ს/კ: 01.12.12.0002.011). სკრინინგის განცხადების მიხედვით, საწარმოს განთავსების ადგილიდან ჩრდილო-აღმოსავლეთით, დაახლოებით 120 მეტრში (პირდაპირი მანძილი) მდებარეობს უახლოესი საცხოვრებელი კორპუსი.

საწარმო წელიწადში მუშაობს 300 დღე, 8 საათიანი სამუშაო გრაფიკით. საწარმოში მიმდინარეობს სამი სახის (ზეთოვანი, ჰიდროიზოლაციური და წყალდისპერსიული) საღებავის დამზადება. საწარმოს წარმადობაა - 1 300 000 კგ საღებავის წარმოება წელიწადში, საიდანაც 600 000 კგ არის ზეთოვანი, 600 000 კგ წყალდისპერსიული და 100 000 კგ ჰიდროიზოლაციური საღებავი. საწარმოში დასაქმებულია 8 ადამიანი.

სკრინინგის განცხადების მიხედვით, საჭირო ნედლეული საწარმოში შემოდის თურქეთიდან ან/და ადგილობრივი ბაზრიდან. საწარმოში ნედლეული დროებით საწყობდება სპეციალურად გამოყოფილ ტერიტორიაზე. სკრინინგის განცხადების დანართში მოცემულია საწარმოში გამოსაყენებელი ნედლეულის სერტიფიკატები და სასაქონლე ნომენკლატურის კოდები. ამასთან, სკრინინგის განცხადებაში

წარმოდგენილია საღებავების (ზეთოვანი, ჰიდროიზოლაციური და წყალდისპერსიული) დასამზადებლად საჭირო ნედლეული და რაოდენობები.

სკრინინგის განცხადების შესაბამისად, საწარმოში საღებავების შერევისათვის გამოიყენება 3 ერთეული დანადგარი-შემრევი. 2 ერთეული განკუთვნილია 15 კგ-დან 200 კგ-მდე საღებავის შესარევად, ხოლო ერთი - 200-დან 800 კგ-მდე საღებავის შესარევად. პატარა და დიდი ზომის შემრევებს გააჩნიათ 2-2 ერთეული რეზერვუარი. იმისთვის რომ არ მოხდეს ზეთოვანი და წყლის საღებავების ერთმანეთში შერევა, ერთი რეზერვუარი განკუთვნილია ზეთოვანი საღებავის დასამზადებლად, ხოლო დანარჩენი - წყალდისპერსიული და ჰიდროიზოლაციური საღებავებისთვის.

საწარმოში ნედლეულის შემოტანა ხდება სატვირთო ტრანსპორტის საშუალებით. თხევადი ნედლეული განთავსებულია შესაბამის პლასტმასის/ლითონის ჭურჭელში, ხოლო მყარი/ფხვნილოვანი სახით წარმოდგენილი ნედლეული - შესაბამის პოლიეთილენის ან/და მუყაოს შეფუთვაში. ნედლეულის განთავსება ხდება შესაბამის საწყობებში.

საღებავის დასამზადებელ სპეციალურად განკუთვნილ შემრევებში ნედლეული თანმიმდევრობით იყრება/ისხმება. ნედლეულის რეზერვუარში განთავსების შემდგომ, ღერძზე დამაგრებული საღებავის შემრევი დისკოს საშუალებით ხდება კომპონენტების ერთმანეთში შერევა. შერევის დასრულების შემდგომ, მიღებული საღებავი ჩამოსხმება რეზერვუარის ძირთან განთავსებული მილიდან, ხოლო რეზერვუარში დარჩენილი საღებავი, სპეციალური ხელსაწყოს მეშვეობით, იწმინდება/იფხვიკება. საღებავები ისხმება, როგორც ლითონის ქილებში, ისე პლასტმასის რეზერვუარებში. მიღებული პროდუქცია საწყობდება სპეციალურად გამოყოფილ ადგილზე. სკრინინგის განცხადებაში მოცემულია საბოლოო პროდუქციის სერტიფიკატები.

სკრინინგის განცხადების მიხედვით, ზეთოვანი საღებავის დასამზადებლად საჭირო კომპონენტს წარმოადგენს ნავთი. ნავთის დასაწყობებისათვის საწარმოში გამოყოფილია შესაბამისი ტერიტორია. დასაწყობებული ნავთის მაქსიმალური რაოდენობა - 1500 ლიტრია. საწარმოში ნავთის შესანახად გამოიყენება 2 ერთეული 1000 ლიტრიანი ტევადობის, რკინის კონსტრუქციით შეკრული პლასტმასის ავზი, რომელსაც გააჩნია შესაბამისი ონკანი საჭირო რაოდენობის ნავთის ჩამოსასხმელად. ავზის ონკანთან განთავსებულია რეზერვუარი/ჭურჭელი ჩამოსხმისას დაღვრილი ნავთის შესაკავებლად. დასაწყობების ადგილზე განთავსებულია შესაბამისი მაფრთხილებელი ნიშანი და ავარიული დაღვრის შემთხვევაში შესაბამისი აბსორბენტი მასალა (ქვიშა). საწარმოს შესასვლელში განთავსებულია სახანძრო სტენდი საჭირო აღჭურვილობით/ინვენტარით ავარიული სიტუაციების თავიდან ასაცილებლად. საწარმოს ტერიტორია მობეტონებულია და ნავთის ავარიული დაღვრის შემთხვევაში ადგილი არ ექნება საწარმოს ტერიტორიიდან გაჟონვას. დაღვრილი ნავთისთვის გამოყენებული იქნება შესაბამისი შთანთქმელი მასალა.

საწარმოს წყალმომარაგება ხორციელდება ქალაქის ცენტრალური წყალმომარაგების სისტემიდან. წყალი გამოიყენება სასმელ-სამეურნეო და საწარმოო დანიშნულებით. ტექნოლოგიურ პროცესში წყალი გამოიყენება როგორც საღებავის დასამზადებლად საჭირო ერთ-ერთი კომპონენტი. სკრინინგის განცხადების მიხედვით, ტექნოლოგიურ პროცესში საწარმოო წყლების წარმოქმნას ადგილი არ აქვს. სამეურნეო-ფეკალური წყლები დაერთებულია ქალაქის ცენტრალური კანალიზაციის სისტემაზე. სკრინინგის განცხადების შესაბამისად, ტერიტორია მთლიანად მობეტონებულია. ნავთის ავარიული დაღვრის შემთხვევაში გამოყენებული იქნება შესაბამისი აბსორბენტი მასალა. აღნიშნული გარემოებების გათვალისწინებით საწარმოს ექსპლუატაციის ეტაპზე ზემოქმედება, როგორც ზედაპირული, ისე მიწისქვეშა/გრუნტის წყლებზე მოსალოდნელი არ არის.

საწარმოში განთავსებულია გამწოვი სისტემა. გამწოვი მილის დიამეტრია - 550 მმ, ხოლო სიმაღლე 11 მ. ამასთან, გარკვეულ წერტილში ღია კედლები ხელს უწყობს საწარმოო შენობის ვენტილაციას. სკრინინგის განცხადებაში წარმოდგენილია საწარმოდან დამაბინძურებელ ნივთიერებათა გაფრქვევის ანგარიში. მოცემული გაანგარიშებების შესაბამისად, მავნე ნივთიერების მაქსიმალური კონცენტრაცია (0,0001348 ზდკ) უახლოეს დასახლებასთან (120 მ) ნორმის ფარგლებშია და მნიშვნელოვანი ზემოქმედება ჰაერის დაბინძურების კუთხით მოსალოდნელი არ არის.

საღებავების წარმოება მიმდინარეობს დახურულ შენობაში. საწარმოში არ არის განთავსებული მაღალი ხმაურწარმოქმნელი დანადგარები. აღნიშნული გარემოების, ამასთან, უახლოეს საცხოვრებელ კორპუსამდე მანძილისა (120) და არსებული ხელოვნური ბარიერების (შენობა-ნაგებობები) გათვალისწინებით, ხმაურის გავრცელებით მოსალოდნელი ზემოქმედება გარემოზე არ იქნება მნიშვნელოვანი.

სკრინინგის განცხადების თანახმად, საქმიანობა ხორციელდება ანთროპოგენური ზემოქმედებით სახეცვლილ ტერიტორიაზე, დახურულ შენობაში. აღნიშნულის შესაბამისად მნიშვნელოვანი ზემოქმედება ფლორისტულ და ფაუნისტურ გარემოზე მოსალოდნელი არ არის.

წარმოდგენილი დოკუმენტაციის მიხედვით, საწარმოს ექსპლუატაციისას ძირითადად წარმოიქმნება საყოფაცხოვრებო ნარჩენები. საწარმოში მცირე რაოდენობით შესაძლოა წარმოიქმნას, ასევე სახიფათო ნარჩენები, რომელიც სკრინინგის განცხადების თანახმად, წელიწადში 120 კგ-ს არ გადააჭარბებს. სახიფათო ნარჩენების მართვა ხორციელდება შესაბამისი წესებისა და ნორმების დაცვით. საყოფაცხოვრებო ნარჩენებისთვის ტერიტორიაზე განთავსებულია სპეციალური ურნები და მათ გატანას, შესაბამისი ხელშეკრულების საფუძველზე, უზრუნველყოფს ქ. თბილისის დასუფთავების სამსახური.

ავარიული სიტუაციების პრევენციის და მართვის მიზნით, საწარმოში განთავსებულია: სახანძრო სტენდი; სამედიცინო ყუთი; მაფრთხილებელი, ამკრძალავი ნიშნები და შესაბამისი უსაფრთხოების წესების შესახებ ინფორმაცია.

სკრინინგის განცხადებაში, გარემოზე ზემოქმედების და ადამიანის ჯანმრთელობასთან/უსაფრთხოებასთან დაკავშირებული შესაძლო რისკების პრევენციის მიზნით, განსაზღვრულია შემარბილებელი ღონისძიებები: დასაქმებული პერსონალის ინდივიდუალური დაცვის საშუალებებით აღჭურვა; სახიფათო უბნებზე შესაბამისი გამაფრთხილებელი და ამკრძალავი ნიშნების განთავსება; მანქანა-დანადგარების ტექნიკური გამართულობის უზრუნველყოფა; გამოყენებული მანქანა-დანადგარების ტექნიკური მდგომარეობის შემოწმება სამუშაოს დაწყების წინ; ნებისმიერი სახის ნარჩენის სათანადო მართვა.

სკრინინგის განცხადების შესწავლისა და მოსალოდნელი ზემოქმედების ანალიზის შედეგად, დადგინდა, რომ საწარმოს ექსპლუატაცია არ მოახდენს მნიშვნელოვან ზემოქმედებას გარემოზე. საპროექტო ტერიტორიის მდებარეობის, დახურულ შენობაში მიმდინარე საწარმოო პროცესის და უახლოეს მოსახლემდე მოსალოდნელი ემისიების გათვალისწინებით პროექტი არ საჭიროებს გარემოზე ზემოქმედების შეფასებას.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სამინისტრომ უზრუნველყო სკრინინგის განცხადების თავის ოფიციალურ ვებგვერდზე განთავსება, ამასთან განცხადება გადაიგზავნა ქ. თბილისის მუნიციპალიტეტის ნაძალადევის რაიონის გამგეობაში, საინფორმაციო დაფაზე განთავსებისათვის. ადმინისტრაციული წარმოების ეტაპზე, პროექტთან დაკავშირებით, სამინისტროში წერილობითი შენიშვნები/მოსაზრებები არ დაფიქსირებულა.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილის და ამავე კოდექსის II დანართის მე-6 პუნქტის 6.2 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ქ. თბილისის მუნიციპალიტეტში, ნაძალადევის რაიონში, შპს „დასის“ საღებავების წარმოების პროექტი არ დაექვემდებაროს გარემოზე ზემოქმედების შეფასებას;
2. შპს „დასი“ ვალდებულია ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტებით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს შპს „დასს“;
4. ბრძანება ძალაში შევიდეს შპს „დასის“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და ქ. თბილისის მუნიციპალიტეტის ნაძალადევის რაიონის გამგეობის საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-

12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი